

**ՊԵՏՐՈՍ ՆԱԽԻՋԵՎԱՆՑԻՆ**  
**ԵՎ XVIII ԴԱՐԻ ՎԵՐԱՆՈՐՈԳՎՈՂ ՀԱՅ ՀՈԳԵՎՈՐ ԵՐԳԸ**

Բաճախի. գիտ. դոկտոր Շ. Լ. ՆԱԶԱՐՅԱՆ

Շուրջ երկու տասնյակ հատորներ են կազմում Պետրոս Նախիջևանցու հեղինակությամբ մեզ հասած ինքնուրույն և մեկնողական երկերը: Դրանց մեծ մասն անտիպ է և ձեռագիր ընդօրինակություններով տարածվել է նաև մայր հայրենիքից դուրս, հայաշատ կենտրոնները, մինչև հեռավոր Հնդկաստան: Միայն Մաշտոցի անվան Մատենադարանում պահվում են նրա երկերի 170 գրչագիր օրինակներ: Նախիջևանցու ստեղծագործությունը, սակայն, ուսումնասիրված չէ: Մեզ հայտնի չէ նրա բազմաբնույթ երկերին նվիրված հետազոտական աշխատություն: Այսուամենայնիվ, Նախիջևանցին հայագիտությանն անձանոթ դեմք չէ: XVIII—XIX դդ. մի շարք նշանավոր գործիչներ խոր ակնածանքով են հիշում նրա անունը և բարձր են գնահատում նրա երկասիրությունները. «Եւ միայն զայս ևեթ ասեմ,— բնութագրում է Պետրոս Նախիջևանցուն XVIII դարի մատենագետ Թադեոս արքեպիսկոպոսը,— թէ ըստ բանի սրբոյն Դավիթ Անյաղթ փիլիսոփային, զամենայն կենցաղական հոգս յետին վարկուցեալ, ողջախոհ իմն մոլութեամբ վարեալ բերիւր զօրհանապաղ ի յընթեցումն գրոց և յաշխատութիւնս գրութեանց զանազան բանից»<sup>1</sup>: Մեսրոպ Թադիադյանը Հաղբատում ընդօրինակում է «մեծանուն մատենագիր, աւուրն պարենի կարօտ երանելոյն Պետրոսի» «զոսկեղէն մատեան Աստուածանմանութեան» երկը և 1827 թ. հրատարակում Կալկաթայում. «Զոր ընդունել աղաչեմ,— դիմում է նա ընթերցողներին,— իբրև հայելի և առաջնորդ հոգւոց ձեռոց, զարգարել զձեզ առաքինաւար գործովք բարութեան»<sup>2</sup>: Բացառիկ դեր է վերապահում Պետրոս Նախիջևանցուն նաև Մսեր մագիստրոս Մսերյանցը. «Պետրոս եպիսկոպոս Բերդումեան ի Նախիջևանայ,— գրում է նա,— այր առատամիտ և լուսաւոր իմաստիւք, որում ոչ ոք գտաւ ցայսօր ի միաբանից էջմիածնի համեմատ ի հանդիսի չիարդին մատենագրութեան և վարդապետական շնորհաց»: Մսեր Մսերյանցը նշեկայացնում է Նախիջևանցու 11 անուն

<sup>1</sup> Մաշտոցի անվ. Մատենադարան, ձև. № 6744, էջ 159ա: Հեղինակը նկատի ունի Դավիթ Անյաղթի «Գիրք սահմանաց»-ի առաջին զինի առաջին պարբերությունը. «Որք միանգամ իմաստասիրութեան տենչան բանից և առ ի նմանէ հեշտութեանց ծայրի միայն մատին հանդիպին ճաշակեալք ամենայն կենցաղական հոգոց բարեաւ մնալ ասացեալք, ողջախոհ իմն մոլութեամբ առ այսոսիկ վարեալք բերեն» (Դաւիթ Անյաղթ, Երկասիրութիւնք փիլիսոփայականք, համահավաք քննական բնագրերը և առաջաբանը Ս. Ս. Արեշտայանի, Երևան, 1980, էջ 29):

<sup>2</sup> Պետրոս Նախիջևանցի, Աստուածանմանութիւն, վերստին աշխատութեամբ Մեսրոպյայ Դաթեան Թադիադեանց Կարբեցոյ, Կալկաթա, 1827 (Նախադեկլացումն): «Երեսցույի ուրեք-ուրեք ի ծանօթաբանութեան իմում,— գրում է Թադիադյանը,— ի գիրս «Աստուածանմանութեան» երանելոյն Պետրոսի Բերթումեցոյ, զոր և բազում վշտօք սպագրեցի ի նորակերտ տպարանի եպիսկոպոսական ճեմարանիս, արդեամբք բարեպաշտօն մերազանցն ի Հնդկիս» (Մեսրոպ Թադիադյան, Ուղեգրություններ, հոգվածներ, նամակներ, վավերագրեր, Երևան, 1975, էջ 408):

դրքերի ցանկը և դառնացած նկատում. «Թող զայնոսիկ, յորոց ոմանք անհե-  
տացեալք շերեհն ի միջի և բազումք (որպէս ասի) հրոյ ի կեր տուան ի թըշ-  
նամեաց և կէսք ի ներքնածրարս մշակապաշտօն արեղայից կաշկանդեալ  
մնան»<sup>3</sup>: «Անխոնջ և նուիրական մատանցն իւր ծնունդ,— գրում է Նախիջևան-  
ցու «Մեկնութիւն թղթոյն Պօղոսի առ Եփեսացիս» երկի մեզ անծանոթ հրա-  
տարակիչը,— գուցէ և հազուագիւտ իսկ ի տեսակին...» «...Զարմանաւոր նըր-  
բատեսութիւն և խորախորհուրդ հանճար հեղինակիս շուրջ աստուածաբանա-  
կան խնդրովք»<sup>4</sup>: «Հռչակված էր իբրև գիտնական-աստվածաբան,— գրում է  
Լեոն,— և էջմիածնի դպրոցի փառքն ու պարծանքն էր կազմում: Սակայն կեն-  
սագրական տեղեկությունները,— շարունակում է Լեոն,— լուսավորչական ե-  
կեղեցու այդ աստղի մասին մենք չունենք»<sup>5</sup>: Բարեբախտաբար Պետրոս Նա-  
խիջևանցու թողած գրական հարուստ ժառանգության առանձին էջերում, նրա  
երկերի ձեռագիր օրինակների հիշատակարաններում պահպանվել  
են տեղեկություններ, փաստեր, որոնց համադրության մեջ գծագրվում է նրա  
արդյունավոր կյանքի ուղին: Ծնվել է XVIII դարի սկզբներին՝ Նախիջևանում:  
Պարսկական արշավանքների ժամանակ, բռնակալ Թահմազ դուլի խանի ա-  
վագակախմբերը քանդում, ավերում են Նախիջևանցու ծննդավայրը, սպանում,  
գերի վերցնում անդեն բնակիչներին: Աստանդական Նախիջևանցիների մեծ  
մասը բնակություն է հաստատում «Եվրոպայի ծայրամասերում»: «Հայրենեաց  
զրկել յոյժ դժուարին չիք»,— գրում է Նախիջևանցին և իբրև ականատես այդ  
ահեղ օրերի պատկերն է վերակերտում պատմականսագրական իր «Ողբում».

Բայց վտան մեղաց մեր զանազան,  
Ի քաղաքէն մեր սեփական  
Տարագրեցաք փախստական  
Յծայր մասի եւրոպական:

Քանզի Թահմազ բռնաւորն այն,  
Շահըն մասին Ասիական,  
Քակեց զերկիրն արեւելեան,  
Զամէն արար փախստական»<sup>6</sup>:

Պետրոս Նախիջևանցու ուսումնառության շրջանը, ըստ երևույթին, սկըս-  
վում է ծննդավայրում, ուր նա անց է կացնում իր կյանքի քսան տարիները  
հոր՝ գիտնական-դաստիարակ Բերդում Աղամալյանի հոգացության ներքո.

Յոր զարգացայ ցըամ քսան,  
Ձեռամբ հօր իմ ազնուական,  
Կշչեալ Բերդում Աղամալեան,  
Առաքինի և գիտնական:

<sup>3</sup> Մ ս ե Ր Մ ս ե Ր հ ա ն ց, Պատմութիւն կաթողիկոսաց էջմիածնի, Մոսկվա, 1876, էջ 259, 260:

<sup>4</sup> Պ ե տ Ր ո ս Ն ա խ ի չ ե ա ն ց ի, Մեկնութիւն թղթոյն Պօղոսի առ Եփեսացիս, Երուսա-  
ղեմ, 1850, առաջաբան:

<sup>5</sup> Լ ե ո, Երկերի ժողովածու, հ. 3, Երևան, 1973, էջ 463:

<sup>6</sup> Մաշտոցի անվ. Մատենադարան, ձեռ. № 6744, էջ 40ա (այսուհետև կնշվի միայն ձե-  
ռագրի համարը):

Որ ո՛չ միայն հայր մարմնական,  
Այլ և ծնող իսկ հոգեկան,  
Կրթէր վարուք բարոյական,  
Մարդէր ի գիրս և շարական՝:

Հավանաբար Պետրոս Նախիջևանցին իր գրական առաջին երկերը գրել է ծննդավայրում, ապա Պոլսում՝ տարագրության մեջ. «...նախքան զմտանելն իմ ի կրօնս, մինչ էի պանդխտացեալ ի Կոստանդնուպօլիս, ի կոչեցեալն Վայե-տէխան»<sup>8</sup>: Պոլսից նա մեկնում է Ղրիմ և ծառայում Ս. Օգսենտի վանքում իբրեւ առաջնորդ: Այստեղից տեղափոխվում է էջմիածին, ուր և ապրում, աշխատում է մշտապես: Սիմեոն Երևանցի կաթողիկոսի օրոք, էջմիածնի կրթական-լուսավորական կյանքի շրջադարձային այդ տարիներին է տարածվում Պետրոս Նախիջևանցի գիտնական-բանաստեղծի հռչակը: Նրա ստեղծագործական լայնահուն գործունեությանը զուգակցվում է նաև մանկավարժական աշխատանքը: Նախիջևանցին դառնում է էջմիածնի ժառանգավորաց դպրոցի սյուններից մեկը: Վախճանվում է 1784 թ. և թաղվում էջմիածնի Ս. Գայանեի վանքի ներքին բակում:

Պետրոս Նախիջևանցու գրչին պատկանող մեզ հայտնի երկերն են՝ «Քարոզգիրք տարեկան» (երկու հատոր), «Աստուածանմանութիւն» (տպագրված), «Տաղարան երկուք» (Աղօթական բանք ընդ աստուծոյ ի խորոց սրտէ սրտաբեկ զղջմամբ», «Մեկնութիւն վերլուծութեանցն Արիստոտէլի», «Տրամաբանութիւն», «Ասացուածք իմաստասիրաց», «Ի նկատմանց Արիստոտէլի արտահանմունք ինչ բաժանեալ երկու գլուխս ապացուցական ձեռնարկութեամբ, հաւաքաբանական ոճի», «Մեկնութիւն Գրոց ծննդեան», «Մեկնութիւն Յոբայ», «Մեկնութիւն Յայտնութեան Յովհաննոս» (տպագրված), «Մեկնութիւն թղթոցն Պօղոսի առ Եփեսացիս» (տպագրված), «Աղբիւր բացեալ» (տպագրված) և այլն: Ինքնուրույն և մեկնողական այս երկերը բազմատեսակ հարցեր են շոշափում, հարստացնում են մեր պատկերացումները հայ ժողովրդի, հայ եկեղեցու XVIII դարի պատմության, դավանաբանական պայքարի, հայ փիլիսոփայական մտքի զարգացման, հայ դպրոցի, մանկավարժության պատմության, բարոյագիտության, մասամբ նաև հայ բանագիտության, երաժշտագիտության և հատկապես բանաստեղծության վերաբերյալ:

Հեղինակի գիտական, փիլիսոփայական, աստվածաբանական և այլ երկասիրությունների ուսումնասիրությունը թողնելով համապատասխան մասնագետների, մենք այստեղ փորձում ենք ներկայացնել բանաստեղծի զիմասնկարը:

Պետրոս Նախիջևանցին XVIII դարի հայոց կրոնաազգային բանաստեղծության նշանավոր դեմքերից մեկն է, հայ եկեղեցական, հոգևոր բանաստեղծության վերանորոգիչը XVIII դարում: էջմիածնի դպրոցի այդ «թագն ու պարծանքը» դարի նշանավոր բանաստեղծներ Պաղտատար Դպրի, Պետրոս Ղափանցու գաղափարակիցն է, բանաստեղծակուն դպրոցի մի ինքնատիպ և ուշագրավ դեմք, քնարական մի այլ անհատականություն: Նախիջևանցին ունի առավել մեծ քանակությամբ բանաստեղծական երկեր, քան իր ժամանակակիցներից որևէ մեկը: Նրա գրչին են պատկանում շուրջ 300 մեծ ու փոքր ծա-

<sup>7</sup> Նույն տեղում, էջ 39բ:

<sup>8</sup> Ձեռ. № 10, էջ 2բ:

վալի գրական ստեղծագործություններ՝ քնարական, պատմաքնարական պոեմներ, բանաստեղծություններ, երկտողյակներ, քառյակներ, ասույթներ (աֆորիզմներ)։ Այս երկերը հիմնականում ներառված են «Աղօթական բանք» և «Երգարան երկուք» խորագրերով ձեռագիր մատյաններում։ Բանաստեղծություններ կան նաև գրչագիր զանազան տաղարաններում, ինչպես նաև հեղինակի տպագրված գրքերի առանձին էջերում։ Նախիջևանցու բանաստեղծական ժառանգության մեջ զգալի թիվ են կազմում եկեղեցական, կանոնական և ոչ կանոնական երգերը՝ աղոթքներ, աղերսներ, տաղեր, շարականակերպ բանաստեղծություններ և այլ տիպի երգեր։ Դրանց մի մասը հորինված է եկեղեցու առօրյա ծեսերի, արարողությունների, ժողովրդականացած եկեղեցական տոների համար. «Հոգևոր և աղօթական տաղից և զանազան շափաբերական բանից, հիմնաւորութեամբ Աստուածաշունչ սուրբ գլոց...»<sup>9</sup> «Ըստ պատշաճի յաւուրց իւրաքանչիւր տօնից և ևս այլ ինչ-ինչ պատճառաւ...», «Գհամառօտական սահման աղօթից կանոնականաց առհասարակ, ամենայն աշխարհականաց, արանց և կանանց, ծերոց և տղայոց, ուսանելի և ասելի յամենայն աւուրս», — գրում է հեղինակը<sup>10</sup>։ Բանաստեղծը ունի նաև հայատառ թուրքերեն հոգևոր երգերի շարք՝ թրքախոս հայության համար։

Պատմական ի՞նչ անհրաժեշտություն կար եկեղեցական երգի վերանորոգության, հոգևոր կանոնական և ոչ կանոնական երգերի նորանոր շարքեր ստեղծելու։ Ինչո՞վ է պատճառաբանվում այդ երևույթը, ի՞նչ է ասում ինքը՝ հեղինակը այդ մասին։

Հայտնի է, որ հոգևոր երգ-բանաստեղծության նորանոր և ինքնատիպ շարքեր են ստեղծում ժամանակակից նշանավոր և ոչ նշանավոր բոլոր բանաստեղծները։ Դա հայ նոր և ընդհանուր վերանորոգության շարժմանը ուղեկից մի երևույթ էր, գաղափարական, ազգային նպատակադիր մի խնդիր, որ ուներ համահայկական մղում։ Կրոնական այբօրինակ երգ-բանաստեղծության նորանոր շարքեր էին ստեղծում դարի նշանավոր գործիչներ Մխիթար Սեբաստացին՝ վենետիկում, Պաղտասար Դպիրը, Պետրոս Ղափանցին՝ Պոլսում, Ղազար Ծահկեցին, Սիմեոն Նրեանցին՝ էջմիածնում, Գրիգոր Շիրվանցին՝ Աստրախանում, Հակոբ Նալյանը՝ Նրուսաղեմում, Գրիգոր Կոմպանյանը, Գևորգ Խուբովը՝ Մոսկվայում և այլք։ Ուշագրավ է, որ զարգացող հոգևոր երգի հեղինակներ էին ոչ միայն եկեղեցական նշանավոր գործիչները, այլ նաև աշխարհիկ բանաստեղծները, հայ ազգային-ազատագրական շարժման, ռուսական քաղաքական կողմնորոշման գործիչները։

XVIII դարի վերանորոգվող գրականության բաղկացուցիչ մասն է կազմում նաև ժամանակի գրաբարալեզու բանաստեղծությունը, ներառյալ վերանորոգվող հոգևոր երգը։ Գրականությունն իր հետ բերում էր նոր ոգի, նոր խոհեմ. այդ ոգին կապում էր միմյանց հայ հասարակական տարբեր շերտերի գաղափարախոսներին, կրոնադավանաբանական ընդդիմադիր թեքերին, լուսավորչական վանականությանը՝ կաթոլիկ վանականության հետ, ազգային-ազատագրական շարժման գործիչներին՝ եկեղեցական նշանավոր գործիչներին, վաճառականների հետ։ Այդ ոգին էր կապում կրոնական առաջավոր երգն աշխարհիկ երգի հետ և ներկայացնում իբրև մի ամբողջություն։ Ինչպես արդեն

<sup>9</sup> Ձեռ. № 6744, էջ 58ա։

<sup>10</sup> Ձեռ. № 10, էջ 164ա։

նկատվել է, գրավոր, գրաբարալեզու բանաստեղծությունն ամբողջությամբ մեջ, որն արտացոլում էր XVIII դարի հայ հասարակական-քաղաքական ու եկեղեցական բարդ իրականությունը, թելադրում էր նաև՝ վերանայել, վերակառուցել եկեղեցական կյանքը, բարձրացնել հայ եկեղեցու կրոնաքաղաքական, ազգային դեմքը, նրա գործնական, բարոյական կշիռը: Դա անհրաժեշտ նախապայման էր օտար, բռնակալական լծի, մահմեդականության վտանգի դեմ կանգնելու, այդ լծի տակ տառապող հայ ժողովրդի գոյատևության ու ինքնահաստատման համար... Պատմական այս անհրաժեշտությունից չլինելով է, որ XVIII դարում վերոհիշյալ բանաստեղծները, այդ թվում նաև Պետրոս Նախիջևանցին, զարգացնում, վերակոչում են հոգևոր եկեղեցական երգ-բանաստեղծությունը. հետևաբար, XVIII դարի հոգևոր երգը չպետք է անուշադրություն մատնել կամ անջատել աշխարհիկ երգից, դրանք պետք է գնահատել միասնաբար, իբրև մի ամբողջություն, իբրև ժամանակի բնականոն ծրնունդ. «...սուրբն Ներսես Շնորհալի, որ զարդարեաց զեկեղեցիս Հայաստանեայց սքանչելարուեստ տաղաչափական բանիւր իւրովը, որք յայտնի են ի միջի,— գրում է մեզ ծանոթ Թադեոս արքեպիսկոպոսը,— իսկ յետ նորա և այլ հոգեւի երգաբանից քան զնա յառաջ և յետոյ եղելոց. ի սոյն դարու ժամանակիս մերոյ քանիք-քանիք ծաղկեցան յեկեղեցական և յաշխարհական կարգաց, որք ընդ թիւ բանից շարադրութեանց, շարահիւսեցին և զներտաղական բանս, որոց մին և երևելին սոյն այս երգարանիս յօրինօղ Պետրոս արդիւնական վարդապետն և գերապանծ եպիսկոպոսն միաբան սրբոյն էջմիածնի»<sup>11</sup>:

Իրապես, Պետրոս Նախիջևանցին միջնադարյան եկեղեցական երգ-բանաստեղծության լավագույն ավանդույթների վերակենդանացնողը եղավ XVIII դարում: «Եւ մանաւանդ նախանձաւոր լեալ,— շարունակում է Թադեոս արքեպիսկոպոսը,— շնորհաց սրբոյն Գրիգորի Նարեկացւոյն և Ներսիսի Շնորհալւոյն, արար զգիրս աղօթից իբր համաշափ աղօթարանի Նարեկացւոյն և զսոյն գրքոյք ներտաղականաց ևս իբր հանգոյն Յիսուս Որդի գրոցն Շնորհալւոյն»<sup>12</sup>:

Խնդրի պատմական շարժառիթներին անդրադառնում է նաև ինքը՝ Նախիջևանցին: Օրավուր, նկատում է նա, գորանում են անօրենների բռնությունները և օրավուր թուլանում է նաև հայ ժողովրդի մեջ սերը դեպի ազգային եկեղեցին, նրա ծեսերն ու սովորությունները, դեպի հայոց հին ու նոր երդերն ու շարականները: «Առաւել ևս,— անկեղծորեն խոստովանում է բանաստեղծը,— զի տեսանելով իմ զմահմեդականս յօժարամիտ ի վճարել զաղօթս իրեանց, վառեալ նախանձալուզութեամբ փառացն տեառն, հիւսեցի զայս համառօտագիծ աղօթս... զի սովիմբ բարձցէ զանաղօթութեան ախտն ի յրոսմկաց, որ է ազգի մերում»<sup>13</sup>: Սա, անշուշտ, նախորդ դարերի հայոց կյանքի ընդհանուր անկման շարունակական արտահայտություններից մեկն էր: Հայոց եկեղեցու ազդեցության թուլացման երկրորդ պատճառը, անօրենների բռնությունների հետ միասին, ժամասացության որոշ զժվարություններն էին: Անցյալից մեզ հասած որոշ աղթքներ, շատ ընդարձակ, երկարաշունչ լինելով, ձանձրույթ էին պատճառում և ասողներին, և մանավանդ լսողներին, հատկապես երիտասար-

11 Ձեռ. № 6744, էջ 158բ—159ա:

12 Նույն տեղում, էջ 159ա:

13 Ձեռ. № 10, էջ 164ա:

դուժյանը: «Բայց նառքենիս առ զօրանալոյ անօրինաց, վասն ծովացեալ մեղաց մերոց,—գրում է Նախիջևանցին,—և ցամաքեցեալ գոլով սէր բազմաց... (բաց եկեղեցականաց), որք և ոչ գէթ զմին յաւուրն ի գլուխ հանեն, թող զկանայս, զուստերս և զդստերս, որք... չճանաչեն զստացիչն աստուած, և ոչ զսահման հաւատոց իւրեանց, ուր մնաց ուսումն կարգաց աղօթից, որք և ոչ գոնեա զտնտնականն ունին ի բերան: Վասն որոյ փոյթ յանձին կալեալ երիս համառօտ կարգս աղօթից բովանդակեմ... Զի գոնէ յայս երիս ժամս աղօթելով բացցին աչք մտաց նոցա...»<sup>14</sup>:

Պետրոս Նախիջևանցին, որպեսզի իր նոր, կարճառոտ աղոթքները, շարականները տաղերը ասելի և լսելի դարձնի, որպեսզի ուժեղացնի ունկնդիրների հետաքրքրությունը դեպի եկեղեցին ու նրա արարողությունները, ժամանակի աշուղական և այլ երգերի գեղեցիկ եղանակները վերցնում, հարմարեցնում է իր առանձին աղոթքներին ու երգերին: Բանաստեղծը դժգոհում է, որ «յախտաւոր» երգերը դեղգեղում էին այնպիսի քաղցրանվագ գունով, որ «ի սէր հրապուրեն» «զլըսօղսն ի մեղս»։ Ուստի,— շարունակում է Նախիջևանցին, «մեծաւ նախանձալուզութեամբ փառացն աստուծոյ, զեղանակսն նոցին կորգեալ և վերացուցեալ իբր յանարժան ենթակայէ, եղանք ի վերա աստուածայնոցս երգոց»<sup>15</sup>: Պետրոս Նախիջևանցու այս վկայությունը, անկախ հեղինակի միակողմանի հայեցողությունից, խոսում է ժամանակի մշակութային կյանքում գոյություն ունեցող ներքին սուր հակասությունների մասին, այն մասին, թե որքան ուժեղացել էր աշխարհիկ կյանքի հորձանքը և թե, իբրև շարյաց փոքրագույնը, որքան զարգանում էր հայատառ թուրքերեն երգը: Հայտնի է, որ այս երևույթը շարունակում էր իր գոյությունը մինչև XIX դարը, որի դեմ այնքան վճռաբար պայքարում էր մեծանուն աշուղ Զիվանին: Այստեղ կա նաև մի նուրբ և կարևոր խնդիր: Սոսկ հաճույքի, մարմնական ցանկությունների շեշտով հյուսված երգերի ծայրահեղ զարգացումը, հայ ժողովրդի իրավաքաղաքական բարդ հարաբերությունների մեղ ծանոթ պայմաններում, շեղում էր ժողովրդի, երիտասարդության ուշադրությունը բուն ազգային, կենսական, գաղափարական խնդիրներից, ազգի և եկեղեցու առջև ծառացած հարցերից: Իրապես «առ զօրացեալ անօրինաց» և «ցամաքեալ գոլով սէր...» հիշատակությունները հայոց պատմաքաղաքական ծանր իրադրության վկայություններն են: Այդ իրադրությունը, բնականաբար, անհանգստացնում էր ոչ միայն եկեղեցական մտավորականությանը, այլ նաև հայ հասարակական-քաղաքական մտքի բոլոր առաջագեմ գործիչներին, առևտրական, արհեստավորական դասերի, կրթված վաճառականության ներկայացուցիչներին, հայ ազգային-ազատագրական պայքարի մարդկանց: Եթե իբրև դառն ճշմարտություն օրավուր մեծանում էր թրքախոս հայության զանգվածը, եթե, դեռևս հավատարիստության դաժան դատաստանից հրաժարվելու պատճառով, աճում էր նաև հայ հերոս-նահատակների թիվը, ապա հասկանալի է, որ գոյություն ունեցող հայության ոչնչացման ահեղ ծրագիր և որ դա սոսկ կրոնական մոլեռանդության արգասիք չէր, այլ՝ սուլթանական Թուրքիայի կողմից հպատակ ազգերի ձուլման ծրագրային դատավճիռ: Հետևաբար, XVIII դարի հայ հասարակական մտքի բոլոր հոսանքների, հայ կրոնական թե աշխարհական դասերի առաջագեմ

<sup>14</sup> Նույն տեղում, էջ 164բ:

<sup>15</sup> Ձեռ. № 6744, էջ 157ա:

ներկայացուցիչները, որքան էլ որ ներքին հակասությունների մեջ լինեին, պետք է միավորեին իրենց ուժերը այդ օրհասական վտանգի դեմ: XVIII դարում կրոնական բանաստեղծությունն ու զարգացումը, ամա, պատմական այս իրողության արդյունքն է: Գրական այդ շարժումը, որի առաջատարներից մեկն է Պետրոս Նախիչևանցին, ընդդիմադիր չէր ժամանակի հայ հասարակական մտքի շարժիչ ուժերի, հայ ազգային-լուսավորական դիմադրողական պայքարի գաղափարախոսությանը՝ լայն առումով:

XVIII դարի հոգևոր երգը վերափոխվում, աշխուժանում է հայության համար ստեղծված իրավաքաղաքական բարդ ու հակամետ հանգամանքներում. որոնց մասին խոսք եղավ վերևում: «Միջին դարերի աշխարհայացքը, — գրքում է էնգելսը, — գերազանցապես աստվածաբանական է: Եվրոպական աշխարհը փաստորեն զուրկ էր ներքին միասնությունից և քրիստոնեության միջոցով էր համախմբված ընդդեմ ընդհանուր արտաքին թշնամուն»<sup>16</sup>: Այս խոր ընդհանրացումը վերաբերում է նաև հայոց անցյալին, ներառյալ XVIII դարը: Պետականազուրկ, աշխարհացրիվ հայ ժողովրդին, ընդդեմ արտաքին թշնամու, օտար բռնակալական կարգերի, միավորում էր նաև հավատքը. դա ժողովրդի ազգային-ազատագրական պայքարի խթանիչ ուժերից, առանձնահատուկ միջոցներից մեկն էր: Պատմական այս նույն հանգամանքների հրամայական պահանջով, ինչպես հայտնի է, հոգևորականությունը XVIII դարում դառնում է հայ հասարակական մտքի շարժիչ ուժերից մեկը:

Հայ ազգային-ազատագրական շարժման նշանավոր գործիչ և տեսաբան Հովսեփ Էմինի այն միտքը, թե «ես ծնվել եմ քրիստոնյա և պիտի մեռնեմ քրիստոնյա, եթե նույնիսկ ողջ աշխարհը մահմեդական դառնա»<sup>17</sup>, հավատացյալի խոսք չէ, այլ քրիստոնյա հայ ժողովրդին ազնիվ, ազատագրական պայքարի մղելու կոչ՝ ընդդեմ «խալամությունը սրով հաստատող» բռնակալական կարգերի: Հովսեփ Էմինը, և առհասարակ գարի առաջադեմ մտավորականությունը, քննադատում են հայ եկեղեցուն, դատապարտում հոգևորականությունը, մերժում նրանց համատեղության, հաշտվողականության ոգին, բայց և չեն մերժում, չեն անտեսում հոգևորականության, հայ եկեղեցու դերը XVIII դարի հայ կյանքի թատերաբեմում: Ազատասիրության գաղափարը Հովսեփ Էմինը պաշտպանում է նաև Քրիստոսի պատվիրանների նորմատիվ նախադրությամբ: Ըստ հրա՛ ազատությունը մարդու բնական իրավունքն է և պայմանավորվում է մարդկանց բանական էակներ լինելու հանգամանքով<sup>18</sup>: Հովսեփ Էմինն այն համոզմունքն ունի, որ եթե հայ եկեղեցու բոլոր ծառաները վարվեին այնպես, ինչպես Վարդանանց պատերազմի նահատակները, Ղևոնդ Երեցը, կամ ինչպես նրա ղինակիցը՝ Մշո Ս. Կարապետ վանքի վանահայր Հովհան վարդապետը, ապա հայ ժողովուրդը կթոթափեր իր վրայից ստրկության լուծը: Գրեթե նույն գաղափարական հայացքն ունեն հայ եկեղեցու և հոգևորականության վերաբերյալ նաև Մովսես Բաղրամյանը և Շահամիր Շահամիրյանը: «Նոր տետրակ, որ կոչի Յորդորակ» նշանավոր գրքի «Շնորհակալություն եկեղեցականաց», «Յաղագս անկման իշխանություն հա-

16 Կ. Մարքս, Ֆ. էնգելս, Երկեր, հ. 6, Երևան, 1958, էջ 298:

17 «Հովսեփ Էմինի կյանքն ու արկածները», Պեյրուի, 1958, էջ 299:

18 Տե՛ս Կ. Դանիելյան, Հայ մեմուարային գրականության պատմությունից, Երեվան, 1967, էջ 104, 109:

յոց» գլուխներում հեղինակը, գնահատելով հայ եկեղեցու ծառայությունները, մեծարելով եկեղեցական հայրերին, բարեկամական դիրքերից քննադատում է նրանց, բացահայտում նրանց սխալներն ու թերությունները: Մի՛ զանց անեք,— գրում է նա,— հայոց պետականության անկման բուն պատճառները, և մի՛ փորձեք ճակատագրով կամ աստծո կամքով բացատրել մեր հասարակական, բարոյական չարիքը: Մեր թերությունների համար մեղավոր ենք մենք, «քանզի չարն անստեղծ է, և ո՛չ է էություն...», «զի աստուած ոչ է չարեաց պատճառ, այլ բարեաց»<sup>19</sup>, հիշում է նա Դավիթ Անհաղթին...: Մի կողմ թողեք անեծքն ավանդական, դրա փոխարեն օգնեցեք ժողովրդին ազատվելու իր կապանքներից: Այս գաղափարն էր ընկած XVIII դարի գրական նոր շարժման գործիչների աշխարհայեցողության հիմքում: XVIII դարի հոգևոր առաջավոր երգը, Պետրոս Նախիջևանցու կրոնական լավագույն երգերը ծառայում են այս գաղափարներին: Նորը և առանձնահատուկը, որով բանաստեղծը տարբերվում է իր ժամանակակիցներից, այն է, որ նա, լինելով Դավիթ Անհաղթի ուսմունքի հետևողներից մեկը, XVIII դարի կրոնական բանաստեղծության մեջ, առավել քան շեշտակի, վերարժարժում է բանականության կարևոր դերը, մարդու կատարելության, աստվածամանության խնդիրը՝ իբրև միջոցներից մեկը կյանքի ճանաչողության, հասարակական հարաբերությունների վերարտացումն: Նրա լավագույն երգերում, աղոթքներում ներքնապես իշխում են բանականությունը, միտքը, գաղափարը, հասարակական կյանքի շունչը: Հոգևոր երգին հատուկ ավետարանական նյութին ու պատկերներին միահյուսվում են իրական, շոշափելի կյանքի նյութն ու պատկերները, սրբերի կերպարների, անունների հետ միասին նաև իրական մարդկանց պատկերները՝ մեծատան, տընանկի, աղքատի, շինականի, վարժապետի, աշակերտի, եկեղեցու առաջնորդի, վարդապետի, քահանայի, սարկավագի, դպրի...

Պետրոս Նախիջևանցին ձգտում է, որքան որ թույլ է տալիս կրոնական, եկեղեցական երգի բնույթը, ազգայնացնել, գաղափարայնացնել հոգևոր երգը, օժտել նրան ճանաչողական հատկությամբ, տալ նրան կենսական հույզ և թրթիռ: Այս առումով XVIII դարի կրոնական բանաստեղծության մեջ բացառիկ օրինակներ են նրա «Աղօթական բանք ընդ աստուծոյ, ի խորոց սրտէ սրտաբեկ զղջմամբ, յատկապես կոչեցեալ Ապաշխարարան» մեծածավալ պոեմը, «Երգ ի տօնի զինաւորաց», «Հառաչանք առ անապատն յանդարտութեան», «Երգ առ անհուն բարին», «Ողբերգութիւն ի մահու մեծ վարդապետաց», «Երգ ասացեալ ի համբակութեան աղերսակերպ», «Երգ բարեկենդանին», «Յաւուր երաշտութեան», «Երգ աղերսախառն առ ի մուտ նոր տարւոյն», «Աղերս մեծատան», «Խրատ երիտասարդաց», «Յաւուր նեղութեան», «Երգ ձմեռնացեալ ծերոց առ ի զգաստանալ», «Խրատ մանկանց», «Ողբ ասելի ապաշխարող մեղաւորաց», «Զուգաոտք, որոյ բանից և անցք աշխարհիս մերոյ արեւելեան եղև զուգորդ» և այլ բանաստեղծություններ ու պոեմներ: Սրանցում ևս իշխում են աղերսանքի, ապաշխարության, աղոթական մրմունջները, բայց ուժեղ է նաև կենսական զգացողությունը և, որ կարևոր է, քննադատական ոգին: Բանաստեղծը առաջադրում է սխալները ուղղելու ելք, միջոց, բարոյապես վերափոխվելու զեղ ու դարման: Երգիչը ամենայն ջանքերով ու կրքով բնութայնից, երկնքից, աստծուց, մարդկանցից, ամեն-

19 «Նոր տետրակ, որ կոչի Յորդորակ», Մազրաս, 1772, էջ 182:

նուրեք խնդրում է՝ օգնել, վշտակցել խեղճին, աղքատին, զրկվածին: «Երգ աղերսախառն ի մուտ նոր տարւոյն» բանաստեղծութիւնը նոր տարվա ավանդական տոնին նվիրված մեզ հայտնի միակ երգն է անցյալից: Երգիչը ընթերցողին է ներկայացնում ժողովրդի առողջ տրամադրութիւնը, նրա հավատը, հույսը նոր տարվա շեմին, նրա լավատեսութիւնը գալիքի նկատմամբ, զգուշացնում մարդկանց շփոթման սխալները, անցյալ տարվա մեղքերը, ոգևորում, քաջալերում է նրանց նոր հեռանկարներով, մաղթում է լինել զգաստ և զգոն, առաջնորդվել բարությամբ, ճշմարտությամբ, մարդասիրությամբ...

Ի գալ տարւոյն հին կատարած,  
Գոհանամ ես զքէն, տե՛ր աստուած,  
Առ ի լինել նոր զանգուած,  
Սրբեա՛ ըզհին խմորն մեղաց:  
Պայծառ հոգւոյս մեր նորակերտ,  
Զգեցուցեր զնոր կապերտ,  
Սև ագուաւոյն զաղտեղի ծերտ,  
Մաքրե՛լ տուր մեզ ջուր արտասուաց:  
Ետուր, գթած, մեզ նոր տարի,  
Բերցէ ընդ իւր մեզ բիւր բարի,  
Ընդ նմին տէր, մեզ հիւր արի,  
Սրտի մեր դուռն է՝ արդ, քեզ բաց...  
Ուրախութիւն մեզ այս մեծ տօն,  
Տեսնէ՞դ շնորհիւ լի և յարտօն,  
Պահեցէ զմեզ զգաստ և ըզգօն,  
Զսահել կրկին ի խոր մեղաց...  
Է յաւիտեան յայնժամաւ,  
Տարի անվերջ մշտաթաւաւ,  
Զանիւ կենաց մեր հոլովեաւ,  
Հասո՛ քոյին անճառ փառաց<sup>20</sup>:

Պետրոս Նախիջևանցու այդ երգերը բացահայտում են տնտեսական տարաքեր կարողութիւնների մարդկանց հոգեկան աշխարհը, հայ շինականի նահապետական, պարզունակ բնավորութեան որոշ գծերը, նրա մշտական ցաւները, նրա հոգսերով լի առօրյան.

Ամէնողորմ գթած հայր մեր,  
Լո՛ւր քաղցրութեամբ զաղաչանս մեր.  
Քաղցրիկ զանձրև դու տո՛ւր մեզ, տէ՛ր,  
Առնել զերկիր մեր պտղաբեր...  
Ամենասուրբ երրորդութիւն,  
Լո՛յծ յերկրէ մեր զերաշտութիւն,  
Շնորհեա՛ զանձրևդ ի լիութիւն,  
Բառնալ զսով և սղութիւն<sup>21</sup>:

Ուրիշ ինչ բանաստեղծութիւն կարող է այնպես ներկայացնել XVIII դարի հողի աշխատավորի մտահոգութիւնը, քան Նախիջևանցու հոգևոր երգարանի «Յաւուր երաշտութեան» խորագրով այս երգը: Անձրև, կենարար ջուր է աղերսում բանաստեղծը հայ գյուղացու անմեղ շուրթերով. ետ տար ևրաշտը,

<sup>20</sup> Ձեռ. № 6744, էջ 103բ—104ա:

<sup>21</sup> Նույն տեղում, էջ 122ա:

բարձիր սովն ու սղությունը («Շնորհա զանձրևդ ի լիութիւն, բառնալ զսով և սղութիւն»), թախանձում է երգիչը երկնային թագավորին: Պետրոս Նախիջևանցին բարձրացնում է նաև նոր ժամանակների հակամետ հասարակական, տնտեսական հարաբերությունների ծնունդ բարեգործության գաղափարը, որը նոր արմատներ է ձգում նաև հայ իրականության մեջ: Բանաստեղծի հայացքով մահմեդական լծի տակ տառապող հայ աշխատավոր ժողովրդի կյանքի բեռը թեթևացնելու համար մեծատուններից շատ բան է կախված: Ուստի մեծատունների գույքը շարժելու նպատակով ժողովրդասեր երգիչը հորդորում է նրանց լինել բարեսիրտ, ողորմած, մարդասեր:

Ամենատէր և մեծանուն,  
Որ արարէր զիս մեծատուն,  
Տո՛ւր ինձ խորհիլ զանկեայս ի տուն,  
Եւ զգեցօղս պատառտուն:  
Ի ծիրանեաց և բեհեզաց,  
Զորս ստացայ ի քոյդ շնորհաց,  
Հանե՛լ բաժին զէթ մինն ի յայնց,  
Մերկ, անզգեստ, խեղճ աղքատար<sup>22</sup>:

Նախիջևանցին ձգտում է բանականության հաղթանակին՝ քրիստոնեական ուսմունքի բարոյական չափերի գործադրությամբ: Բանաստեղծը չի հովանավորում կույր, անշարժ, ինքնանպատակ կրոնական կոչումն ու հավատասիրությունը, հավատը պետք է նաև գործով զարդարվի:

Սուրբ զկոչում քո ի հաւատ  
Բարեաց գործով արա հաստատ.  
Քանզի հաւատն միայն չէ շատ,  
Այլև գործով զարդարիլն է<sup>23</sup>:

«Յաւուր նեղութեան» աղերս-բանաստեղծությունը, որ երգվել է եկեղեցում, հայոց իրավաքաղաքական ծանր վիճակի դեմ ուղղված սրտառուչ մի բողոք է, բխորավոր ցավերով պատած մի անմեղ ժողովրդի կյանքի տխուր քնարերգությունը:

Ամենախնամ տէ՛ր երկնաւոր.  
Հայա՛ց ի յազգս անթագաւոր,  
Պատեալ վշտօք հազարաւոր,  
Յո՛չ ումեքէ նպաստաւոր...

Որպէս յդի ծրննդկան,  
Երկունք պատեալ, պաշարեալ կան  
Ո՛չ որ ունիմք մեզ օգնական,  
Աղաղակեմք ողորմական...<sup>24</sup>:

Նախիջևանցու քնարը միահույզ, միալար չէ, նրա վերոհիշյալ երգերը զգացողությունների և իմացությունների մի բարդ, հակասական ամբողջու-

22 Նույն տեղում, էջ 80ա—բ:

23 Զեռ. 1991, էջ 207ա:

24 Զեռ. № 6744, էջ 122ա—բ:

թյուն են: Խորապես ապրելով իր դարը, միաժամանակ կրելով սուրբ հայրերի, հին հունական փիլիսոփայության, հատկապես Պլատոնի և Արիստոտելի և հայ ազգային գրականության, փիլիսոփայության մեծերի՝ Դավիթ Անհաղթի, Գրիգոր Նարեկացու և Ներսես Շնորհալու ազդեցությունը, հավատացյալ բանաստեղծը հանդես է գալիս մերթ իբրև հավատքի և հայրենիքի ծանրախոհ երգիչ, մերթ՝ պարզ խրատանքի, ուրախության ժողովրդաաշուղական հանգի ու ոճի մի բանաստեղծ, մերթ՝ խռովահոգ, աշխարհամերժ մենակյաց մի կրոնավոր, մերթ՝ երկնային, մերթ՝ երկրային, մերթ՝ երազող, վերացած, մերթ՝ իրապաշտ, մերթ՝ խոր աստվածաբան, մերթ՝ ճշմարիտ փիլիսոփա, գեղագետ: Սակայն հուսահատական դեգերումների, երկնային սավառումների մեջ ևս Նախիջևանցին, այնուամենայնիվ, կապված է կյանքի հետ: Միշտ դեպի երկինք, «դեպի անհուն բարին» թեմաները երգչի սիրտը տրոփում է աշխարհի, մարդու, իր ժողովրդի կյանքի համար: Բանաստեղծի այս տիպի երգերը կենսական-իմացական ներքին ազդու ուժ ունեն և բարձր են քնարական արվեստով, բանաստեղծական կատարելությամբ:

Երկնաքանդակ դու ապահով նաւահանգիստ զերաղանց,  
Տոգնատրտուն, որք ի ծովու այսր աշխարհէն անցան.  
Բաղձեա սիրտ իմ, թուիլ յերամս քոյին մաքուր միանձացն.  
Մոլորեալ եմ, ընկալ և զիս ի քո սուրբ ծոցդ անապատ:  
Սուրբ աղօթք մշտամիմունջ աղաներամ քո պարուց,  
Միւն աշխարհի հաստատութեան՝ ազգիս, մանաւանդ, Հայոց,  
Սիրտ իմ բաղձեա հաղորդակցիլ, ընտրեալ որդւոց քոց բարոց.  
Մոլորեալ եմ, ընկալ և զիս ի քո սուրբ ծոցդ անապատ<sup>25</sup>:

Երկրային, իրական աշխարհը հեղձուցիչ է, նեղ՝ ծանրացած մեղքերի, անարդարության բեռների տակ. կյանքից ու աշխարհից դառնայած, ձանձրացած բանաստեղծը երազում է իր նախնիների, սուրբ հայրերի, գիտունների օրինակով քաշվել անապատ, հաղորդակցվել ընտրյալների հետ, որպեսզի անդուլ ճգնությունը կարողանա հոգով, գործով մենամարտել լարի, ախոյանների դեմ:

Բամից շարեաց գտակ շարին յաղթել պէս-պէս փորձանաց,  
Դու ես տեղի ախոյանից, հոգով մենամարտողաց,  
Ուստի առ այս գէակիցն չիւր հոգին յանապատ վարեաց.  
Մոլորեալ եմ, ընկալ և զիս ի քո սուրբ ծոցդ անապատ:  
Ո՛ր տայր ինձ զթէ աղանոյ, ըստ բաղձանաց ասողին,  
Թուիլ և դադրիլ ի քեզ, ընդ այնց, որք զաշխարհն թողին,  
Զի ձանձրացայց և խռովեցայց զբազմանացս ըստ Երգողին.  
Մոլորեալ եմ, ընկալ և զիս ի քո սուրբ ծոցդ անապատ<sup>26</sup>:

Հաշտ հոգով մահվան ձգտում, հանդերձյալ կյանքի նկատմամբ ղդայական կամ իմացական մղում չէ սա և ոչ էլ սոսկ կրոնավորի զղջում, ապաշխարություն՝ բառի նեղ առումով, այլ՝ հավատացյալ բանական էակի խոր ընդվզում, արդար կովի մեջ պարտված ու զրկված մի ժողովրդի ողբերգության ցավագին արձագանք: Հուսահատությունը երևութականանում է իբրև կործանողական գաղափարի, անհաշտելիության ոգու արտահայտություն: Չար և դաժան

<sup>25</sup> Ձեռ. № 1991, էջ 100ա—բ:

<sup>26</sup> Նույն տեղում, էջ 103ա:

«դարանակալ» թշնամին, այլաբանում է երգիչը, խավարածիզ նետերով վայր է գլորել նրան գարերի բարձունքից, խափանել նրա երկրային թռիչքը: Բանաստեղծը անհուն ատելությամբ լցված երազում է նոր թռիչք, աղերսում է երկնային թագավորին պարգևել հզոր թևեր՝ կորցրած բարձունքներին հասնելու համար:

Բամբ որսորդաց դարան գործեալ վասն իմ թռչնոյս երկնադնաց,  
Հարեալ նետիւք խաւարածիզ ընկեցին զիս ի բարձանց, ի բարձանց,  
Վա՛շ, թէ տայր տէրն իմ ոգեսէր հոօր ինձ թևս աղանեաց,  
Զի առ եթերն իմ լուսաճէմ վերաթռուցէր թևն զիս, թևն զիս...  
Երկրաւորիս սիրոյ տոռամբ<sup>27</sup> անմահ հոգւոյս մահաբեր,  
Վայրաբերեալ պարաւանդիմ ի պատճառաց անտարբեր, անտարբեր.  
Վա՛շ, թէ զարթեալ վերնոյն յիս կայծ շարժիցէր զիս զառիվեր,  
Եւ ի կայանն իւր սեփական վերբերիցէր հրովն զիս, հրովն զիս<sup>28</sup>:

Անարդար պետք է լինել կարծելու համար, թե սրանք սոսկ հավատացյալի վերացական պատրանքներ են: Իրականության դեմ սքեմավոր բանաստեղծի քաղաքացիական միտքն է բորբոքվում, ժամանակի շունչն է տակնուվրա անում երգչի հոգին: Ժողովրդին, ազգին, եկեղեցուն անձնվիրաբար ծառայելու հարցն է Նախիջևանցու այս երգերի խորին խորհուրդը: Եթե նույնիսկ հայրենի աշխարհը, — գրում է երգիչը, — ծագեիծագ լցվի ամենայն ինչքով, բարիքով, հարստությամբ, դարձյալ սպեղանի չեն կարող լինել երգչի խոցված սրտի համար կամ թեթևացնել նրա տառապանքները:

Տունս արամեան, լայնածաւալ լցեալ ինչիւք ծագ ընդ ծագ,  
Թէ իցեմ, տէր, չէ՛ բաւական ընդ բաղձանս իմ ցյալգ, իմ ցյալգ,  
Ուրեմն, վաշ թէ՛ յանքոյթ կայանն վերբերիցէր արագ,  
Զի հանգուցէր ի ծարաւոյ անհուն փառաց ծովն զիս, ծովն զիս<sup>29</sup>:

Հասարակայնորեն չիմաստավորված, անօգտակար, անօգուտ կյանքից ետ կանգնելու, սթափվելու, վերակերտվելու, մարդկային կյանքի կատարյալ ճանապարհ ընտրելու մեծ խորհուրդ ու պատգամ ունեն Նախիջևանցու այս բանաստեղծությունները: «Երգ ձմեռնացեալ ծերոց առ ի զգաստանալ» բանաստեղծությունը ևս նման չէ կյանքի և մահվան շուրջը անցյալում հյուսված երգերին: Նորակերտ քնարական մի կտավ է այն, որ ամեն մի ընթերցող բանական էակի կարող է խոսեցնել յուրովի. ամեն ոք խորունկ ցավ կարող է զգալ իր կորցրածի, իր չգտածի, իր մեղքերի, սխալների համար...

Իբրև արծիւ բարձրաթռիչ սրաթև,  
Խոյանալով, սլանալով հըրածև,  
Այլ ամփոփեա՛, արդէն զթև քո ըզքև,  
Որովհետև, ահա՛, ծերացար անձն իմ...  
Էիր ստոյգ ի մանկութեան վարդ գարնան,  
Եղիր ծաղկեալ և պտղալից յամառան,  
Այլ թօթափեալ ի ժամ աշնան ծերութեան,  
Իբրու ձմեռն ալեօք ձիւնացար, ա՛նձն իմ<sup>30</sup>:

<sup>27</sup> Տոռն նշանակում է պարան, թուկ:

<sup>28</sup> Ձեռ. № 6744, էջ 64բ, 65ա:

<sup>29</sup> Նույն տեղում, էջ 65ա:

<sup>30</sup> Նույն տեղում, էջ 108ա:

Պետրոս Նախիջևանցու այս երգերը օտար բռնակալների արշավանքների, ավերումների վերաբերյալ նախորդ դարերի ողբերի, պատմահայրենասիրական վերհուշերի խաղաղ, նկարագրական ոճը շունեն։ Հոգու և մարմնի, կյանքի և մահվան, մարդ բանականի և երկնայինի վեճերի ու խորհրդածությունների ներքին հյուսվածքից հաճախ ժայթքում է ըմբոստության, անհաշտության ոգին, աղոթական մրմունջներին ներքնապես միահյուսվում է պայքարի տենչը։ Այս առումով բացառիկ է Նախիջևանցու «Երգ ի տօնի զինաւորաց» բանաստեղծությունը։ Այստեղ երգիչը քրիստոնյա զորավարների նահատակների պայքարի օրինակով արձագանքում է ժամանակի հայոց ազգային-ազատագրական շարժմանը, դեպի մահ, դեպի կռիվ դաշտ, դեպի հաղթանակ ընդդեմ չարի՝ հորդորում է բանաստեղծը։

Պարծանք համայն զինաւորաց՝ զօրագլուխ հաւատոյ,  
Որ զինեցեր զինաւորս՝ զինու խաչին խորհրդոյ.  
Զինեա՛ և զիս, զինաթափո՛ւրս զօրեղ այսու լինու քո,  
Խոցել զգլուխ շար վիշապին զինու խաչին պարծանաց<sup>31</sup>։

Եթե մահմեդական բռնակալությունը սրով է ոչնչացնում քրիստոնյա հայերին, սրով հաստատում իր կրոնական իրավունքը, ապա տրամաբանական է, որ հայ ժողովրդասեր, հավատացյալ բանաստեղծը պետք է կոչ անի, որպեսզի քրիստոնյա հայ զինվորը ևս իր հավատքը զենքը դարձնի և այդ զենքով պաշտպանի իր կրոնն ու հայրենիքը։ Դժվար չէ նկատել, որ Պետրոս Նախիջևանցու այս հայացքը ի վերջո համախոս է Հովսեփ Էմինի վերևում հիշված ծրագրային առաջարկությանը, համաձայն որի՝ եթե հայ զինվորը իր զգեստանշանի վրա կրի քրիստոնեական խաչը և ընդդեմ թշնամու իր արյունը թափի նույն այդ խաչի ներքո, ապա կարելի կլինի հաղթել հայրենիքի անարգ թշնամիներին և ազատագրել հայրենի հողը։ Նախիջևանցին պատգամում է հայությունը զինվել նեո ու գեղարդով, հանկարծակրի բերել թշնամուն, խոցել շար վիշապի գլուխը, նրա ոտքերին դնել սլարտություն սոնապանը։

Եզիր ի գլուխ մտաց նոցին յուսոյդ վերին ուղաւարտ.  
Զաղղել շարին յանկարծածիդ նեո ու քարինք կամ դեղարդ.  
Յուսով փառաց արքայութեան արա գլուխ իմ թագազարդ,  
Որպէս Սարգիս սուրբ զօրապետ անսահ մարտիլ ընդ դիւաց...  
Սրունից նոցին զգեցուցեր խոնարութեան սոնապան,  
Յամէն շարին մեքենայից լինիլ նոցա պահապան.  
Տո՛ր ինձ զայն գէն ընդդիմանալ խորախորհրդոց հպարտութեան,  
Որով շարի սլարանոցին ոտն իմ լիցի յարակաց<sup>32</sup>։

Մսեր Մսերյանցը, վերհիշելով Առաքել Դավրիժեցու հայոց պատմության էջմիածնի ներքին կյանքին վերաբերող տխուր պատկերները («Էջմիածին... կային միայն միաբանք սակաւք և այնք ևս յոյժ տգէտք...», «Անագլուխք, սինլիքորք...» և այլն), նկատում է, թե «բանք այսպիսիք յաճախ գտանին նաև ի գիրս Պետրոս եպիսկոպոսի Բարթողիմեան»<sup>33</sup>։ Իրոք, ինչպես ականարկեցինք վերևում, Նախիջևանցու թե՛ աստվածաբանական, գիտափիլիսոփայական և թե՛

31 Նույն տեղում, էջ 74ա—բ։

32 Նույն տեղում, էջ 74բ։

33 Մ. և Բ. Մսերյանց, Պատմութիւն կաթողիկոսաց էջմիածնի, էջ 261։

բանաստեղծական մի շարք գործեր լի են պատմական ուշագրավ տեղեկություններով, հատկապես վերևում հիշված ողբերի մեջ Վգալի է հայ ժողովրդի և՛ անցյալի, և՛ նոր ժամանակի պատմաքաղաքական կյանքի շունչը: Բանաստեղծի այսօրինակ երկերից առավել ուշագրավ են «Ողբերգութիւն ըստ ողբոցն Երեմիայի, յորում նախ յամառօտ յիշատակ անցիցն երկրին իւրեանց և զկնի ապաշաւ ի հոգւոյ» պոեմը, «Զուգաւոսք, որոց բանից և անցք արեւելեան աշխարհիս եղեն զուգորդ» և «Ողբ ասելի ապաշխարող մեղաւորաց» բանաստեղծությունները: Առաջինը Նախիջևանի 1740 թ. գրավմանը նվիրված մեզ հայտնի միակ պատմական երգն է, տխուր, դառն իրականության սրտառու մի արձագանք: Ժողովրդասեր բանաստեղծը սրտի խորունկ ցավով է ներկայացնում այն տառապանքները, որ կրում են քաղաքի անդեն ու անպաշտպան բնակիչները՝ մանուկները, նորահարս կանայք ու աղքիկները: Բանաստեղծը սգում է հայրենի քաղաքի անկումը. իբրև մի այրի, որդեկորույս մայր Նախիջևանը բարձրաձայն ողբում է իր օրհասական վախճանը՝ դիմառնության ծանոթ եղանակով.

Այլ ես գուրվ մեղանշական,  
Լցեալ ախտիւք կորստական,  
Թողում ողբալ անօգնական  
Քակեալ քաղաքն նիւթական.  
Այլ ձայն երգեմ աղերսական,  
Ընդ քաղաքիս իմ անձնական,  
Զբան տեսողիս ողբերգական,  
Առ իս փոխեալ դիմառնական<sup>34</sup>.

Սուր, հակադիր պատկերներին, նկարագրություններին մեջ ընթերցողի առաջ վերակենդանանում է Նախիջևանը իր խաղաղ, անվրդով օրերի շինարար աշխատանքով ու կյանքով և ասլա՝ բարբարոսների կրունկի տակ՝ ավերված, կիսաշունչ...

Քաղաք էի ես տիրական,  
Լցեալ որդւովք հոգիական,  
Հաւատարիմ ու պատշաւական,  
Արդարութեան հանգստարան,  
Բացի դրունս զգայութեան:  
Հանդէպ զօրաց լէզէօնեան,  
Հարբ և հոգւովն հանդերձ փեսայն  
Զքաղաքս լքեալ յինէն զատան:  
Եղէ քաղաք պոռնկութեան,  
Լեալ հոմանոյն ասպանջական,  
Սպանողաց դիւոց կայան,  
Չար մատնացրն օթարան<sup>35</sup>:

Երգիչը վերակենդանացնում է պատերազմական այն ցնցող իրականությունը, որի ականատեսը լինելու դժբախտությունն է ունեցել ինքը: Ընթերցողը լսում է ստրկության դատապարտված անմեղ հայերի հառաչանքները, օգնության, աղերսանքի կսկծալի մրմունջները.

34 Ձեռ. № 6744, էջ 40ա:

35 Նույն տեղում, էջ 40ա—բ:

Ընդ խաւարին իշխանութեան  
 Նստիմ ի մէջ ծառայութեան,  
 Ազատարար որդւոց մանկան,  
 Դարձո՞ր ի կեանս ազատութեան:  
 Ներ թշնամեաց հմ նախատման,  
 Հալածիւր իմ հանգիստ ոչ տան,  
 Հանգստարար մերոց յոգւոց,  
 Հանգո՞ր ի քեզ զիմ խղճմտան<sup>36</sup>:

Թշնամին ոտնակոխ է անում մարդկային բարոյականութեան բոլոր սահմանները, պղծում է հայրենի սրբութիւնները, տրորում անմեղ կանանց ու աղջիկների պատիւը: Ինչպե՞ս պատահեց այս բոլորը, ինչպե՞ս թույլ գտնվեցինք փակելու մեր զգայութեան դռները, ինչպե՞ս չկարողացանք կանխել շար թըշնամու երթը, ինչպե՞ս թույլ տվեցինք մեր աշխատանքի արդար վաստակը ավար դարձնելու թշնամուն,— դառնացած հառաչում է բանաստեղծը:

Զի՞արդ շլացաւ ոսկին պայծառ,  
 Ոսկիաթագ հոգիս կայտառ.  
 Այլագունեալ սպիտակ արծաթս՝  
 Զի՞արդ պատեաց զինե խաւար:  
 Զի՞արդ յղկեալ ակունքս դո՛շար  
 Սպառնցան յանցս ընդ ճանապարհ,  
 Ստացուածոց բարեաց գումար  
 Զար թշնամույ եղեն յաւար:  
 Պատուականօք իմ որդւոց գուպար,  
 Զինե սփռեալ ականաշար,  
 Զի՞արդ հանգո՞յն խեցեաց բեկան,  
 Գործոցն բիրտ նմանաբար<sup>37</sup>:

Բանաստեղծը մեկ առ մեկ ներկայացնում է Թահմազ բռնակալի և նրա հրոսակախմբերի գաղանային արարքները, հայ անմեղ կույսերի, մանուկների, հարսների նկատմամբ նրանց գործադրած զարհուրելի, հրեշալոր սանձարձակութիւնները:

Մերկացուցին վիշապապար,  
 Զստինս իւրեանց հարսանց ի պար,  
 Դիացուցին կորիւնս իւրեանց,  
 Ստիպման հարկին լեալ անպատկառ:  
 Ի դստէրացս գեղանկար  
 Բժշկութիւն փախեալ ի տար,  
 Տառապանօք, շալլամաբար,  
 Յանապատին շրջին ի թափառ:  
 Մինչ քաղց, ծարավըն սաստկանայր,  
 Խումր դիեցիկ մանկանց ի լայր,  
 Զի խնդրէին զհաց և ջուր,  
 Եւ ոչ ոք էր, որ նոցա տայր<sup>38</sup>:

Պետրոս Նախիջևանցու այս պոեմը հայ ժողովրդի նոր ժամանակների ահեղ օրերի ողբն է, նրա ազգային խորունկ ցավերի ճշմարտապատում արտա-

36 Նույն տեղում, էջ 51ա:

37 Նույն տեղում, էջ 52ա—բ:

38 Նույն տեղում:

հայտնությունը: Այս երգերը բերում են վշտի մի զգացողություն, ազգային թախծի մի շնչոտ. որ հատուկ են նոր ժամանակների բանաստեղծությանը: Կյանքի անարդարությունները, հայրենի երկրի, եկեղեցու թշվառությունը, շարունակվող անկումը և միաժամանակ անցած փառքը, երանելի օրերի հուշերը փոթորկում, տակն ու վրա են անում ազգասեր բանաստեղծի հոգին: Նա ելք է որոնում իր ժողովրդին այդ վիճակից դուրս բերելու համար և, մի հետադարձ հայացք նետելով անցյալին, ոգեշնչված նարեկացու հանճարեղ «Մատենով», գրում է Ողբերգության մի նոր մատյան XVIII դարի հայ հավատացյալ մտավորականի Ողբերգության մատյանը:

**ПЕТРОС НАХИДЖЕВАНЦИ  
И ОБНОВЛЕННАЯ АРМЯНСКАЯ ДУХОВНАЯ ПЕСНЯ XVIII ВЕКА**

Доктор филол. наук Ш. Л. НАЗАРЯН

(Резюме)

Перу Петроса Нахиджеванци принадлежит около двух десятков томов, большинство которых еще не опубликовано. В них затрагиваются различные вопросы, которые обогащают наши представления об истории армянского народа, армянской церкви XVIII века, о развитии армянской философской мысли, истории педагогики, музыки и особенно о поэзии. В данной работе сделана попытка представить Петроса Нахиджеванци как одного из значительных поэтов, принадлежащих к армянской национально-религиозной поэзии XVIII века. Он является автором около 300 больших и малых лирических произведений—поэм, стихотворений, четверостиший, афоризмов и др. П. Нахиджеванци стремится, насколько это позволяет специфика религиозной, церковной песни, придать духовной песне познавательный характер, жизненность.